



28 OTAA HOKOLOLWA YE LI MONDHOLO-NGO PAVETA AG 9, YAHEYALI YOMUYO INASHI KOLEKWA MANGA

Omadhina gaanashilonga ya ELC (ELOC) gane oga holoka momusholondondo gwomadhina 21 gaantu mboka ya kwatwa po paveta AG 9, okuza petameko lyomumvo nguka. Omadhina gaheyali inaga kolekwa natango paveta kutya nayo oye niwe ngaashi yakwawo.



Nakusa L. Amupolo

Omusitagongalo Sakeus Shaduka, Oshaango, omuyevangeliste Abisai Ihuhwa, Onankali, omuyevangeliste Andreas Namhweya, Endola, nomuyeva-

ngeliste Timoteus Shikongo, Onanghulo, omadhina gawo oga holoka melandulathano lyomadhina ngoka ga zimnwa kombelewa yaapolisi mOvenduka kutya oya dhigininwa.

Omuwiliki gwopaati; Namibia Christian Democratic Party (NCDP) omusamane Hans Rohr oye i indila Ngoloneya Ndyayi gwa SWA a mweneke mbala omakwato ngoka taga ningilwa aakwashigwana, mboka a ti kutya oye hole ombili.

Elelongeleki lya (ELOC) lyeti 23-24.1.1985, moshitokolitho shalyo oshiti 5, olya adhikwa lya tseyithilwa

shono shi inyenge momagongalo galyo, kombinga yekwato lyomuyevangeliste A.Ihuhwa.

Pamwe naye opwa tseyithwa wo omukuluntugongalo megongalo, Opuwo, mOkaoko, kutya naye okwa kwatwa po.

Pamahokololo gamwe ngoka inaaga kolekwa paveta, aantu mboka ya kwatwa okuza Januari sigo opetameko lyaFebuluali oye vule kashona 30.

Omusamane Shaduka gwomumvo 56, omuleli gwegongalo li na iilyo yi vule 4,000 muuzilo wOndonga, okuza 1965.

Omadhina goonkwatwa dhilwe tala palwe moshifo shika.

ELELONGELEKI LYETI 23-24.1.1985, MONOMOLA YALYO ONTI 6/1985 OYA HOLOLA OLUHODHI LWALYO OMOLWONKUNDANA YOLUHODHI YOMUYAKULIGONGALO GWAA-NIILONGA MOVENDUKA, OMUKULUNTUGONGALO LUKAS AMUPOLO; NGOKA A KUNDANWA KUTYA OKWA SI O-MBAADHILILA, A LYATWA KOSHIHAUTO.

SHIKA OSHA NINGILWE 22.1.1985 NEFUMVIKO OLYA LI LYA NINGILWA MEGONGALO LYAANDJAWO, OKAKU. OMUSAMANE AMUPOLO OKWA YAKULA OMIMVO ODHINDJI MEGONGALO LYAVENDUKA LYOMONDOLOPA.

Gunnar Staalsett a hogololwa a ninge amushanga gwehangano lyAakwaluther

Ewilikongundu lyOngongahangano yAakwaluther ayehe muuyuni (LWF), olya hogolola omwedhi nguka Omunorwee Gunnar Johan Staalsett a ninge amushanga Ndjayi gwehangano ndyoka.

Staalsett gwomimvo 50, ota pingene dr Carl H. Mau (62) Omuyamerika ngoka a yakula moshilonga shoka omimvo konyala 10 dha zi ko.

A hošana noku na aanona yaali, Staalsett oye amushanga omutihamano gwehangano lyAakwaluther okuza 1947, sho lya dhikwa. Ashike oye gwtango a kuthwa kiilongo yuumbangalantu waEuropa.


Okuza 1961 sho a yapulilwa oshilonga shuusi-tagongalo, okwa kala omusita gwaagundjuka omimvo ndatu, moshitayingeleki shaHamar muNorwee. E ta ka ninga omulongi mosikola yuusita muStavanger, muFrans 1964-1970.

Omumvo 1970 ogwo a tameke okukwatathana niilonga yi na sha nOngongahangano yAakwaluther sho a kala amushanga omukuluntu gwokomitiye yOngongahangano yAakwaluther mOngoleki yaandjawa sigo 1977.

Omumvo 1972-73, okwa kala amushanga gwo-shilongo moka kwa li e na sha niinima yeputudho nomithigululwakalo, eyakulo lyopangeleki, osho wo elongitho lyiimaliwa.

Omumvo 1973, okwa talele po iilongo yimwe yaAfrika uule woomwedhi mbali niwike ine okwa talele po iilongo yaakomunisi mwa kwatelelwa Ndowishilanda lyokuuzilo naRusia omumvo 1982.

Staalsett okwa yakulithwa muukomitiye wi ili nowi ili mboka u na sha nomahangano omanene



Amushanga omupe G. Staalsett



Oonakusa David Shihepo nomukadhi

goongeleki muuyuni LWF na WCC, osho wo okwa popitha iigongi oyindji yopapangelo muuyuni yi na sha nepotokonono lyomikundu dhuuyuni.

Omupresidende Zoltan Kaldy, gwOngongahangano yAakwaluther ngoka a hogololelwa oshilonga shoka muJuli gwa zi ko, okwa ti kutya Staalsett omulumentu omukriste nohu uvu ko mbala iinima yopapolitika, onke ota ka kwatha mehilathano lyAauninginino nAuzilo.

Omutetekeli gwe Carl Mau, ye oku mu shi ngeyi, kutya Staalsett "omuwilikilela."

Staalsett ye mwene mukupopitha ewilikongundu ndyoka lye mu hogolola, okwa ti ye ota tamba neifupipiko eithano ndyoka lyeyakulo lyopaKalunga pamukalo ngoka.

Omulongi noshilongashe

Aavali oyendji naalongwa wo yoyene yamwe po ohaa kala neipulo, kutya, omulongi oshike naanaa?

Otu na pethimbo ndika aalongi oyendji ya pita nawa moosikola dhopombanda noya popyoka nawa meilongo. Ihe shono inashi mana po natanngo epulo kutya omulongi oshike.

Natu endlule ano iitsa tayi landula mpaka ngaashi hayi yamukulwa noshito.

- Omulongi oye ngoka ihaa longele ondjambi.
- E na ohokwe moshilonga she.
- E hole oshigwana she nohi idhimbwa omolwasho.
- Ihaa longitha iikunwa pethimbo lyiilonga.
- Omulongi oha kala a tseyana nawa oshilonga she.
- Omunethimbo esiku kehe miilonga ye.

Osha yela kutya oku na wo omaukwatya omakwawo gomulongi nando inatu ga tumbula mpaka.

Tseni aalongi tu kambadhaleni okukala pashilonga shetu, twaa limbilike aantu. Oshigwana osha pumbwa aalongi yoosikola dhomaludhi gi ili nogi ili shi wape okutekulwa nawa muunongo womomadhiladhilo nowokiikaha.

Kauko Shikongo

ESO

Omukulupe Eva Tomas mOshigambo, okwe tu thigile po 15.12.1984 moshipangelo shaNandjokwe konima yuwehame wethimbo ele. Okwa li e na omimvo 88.

Okwa landula omusamane gwe omusita David Shihepo ngoka a hulithile oondjenda dhe 1983.

Oya thigi ko oyana yatano, aatekulu 41, naatekululwa 10.

Tse aakwanezimo otatu mu pandula aashiinda nego ngalo alihe lyaShigambo komayakulo geni.

Elizabeth N. Uugwanga

Etumo paeendunge daSalomo 1:20-33

Oshipango shetumo osho "Indeni nounyuni aushe," Opwa wedwa: "Ka ningeni aveshe ovahongwa vange, va shasheni, va longeni okudiinina."

Jesus okwa popya moitya ya yela osho sha kala elalakano lovatumwa vaKalunga mEtestamendi Likulu.

Okuninga okwo okuudifa. Okuudifa osho oshityadina sha dja koshityalonga okuuda. Opo omunhu a ude, opu na okukala umwe ta popi, ta ingida, ta weelele ile ta kwena.

Eudifo eli lounongo olo otali udika meingido li li pondje, mondaka ya yeluka i li mombadambada omo mu na ombuyaano yeudifo lounongo, tau ingililwa kounongo.

Opo ounongo u shiivike, owa li u na okutwala apeshe, okulongwa keshe pamwe. Jesus ote shi hokolola sha yela, kutya opo exulilo li uye, evaengeli louhamba waKalunga oli na okuudifilwa tete ovanhu aveshe.

Ndele oli na yo okweenda mokati komaudjuu nomaupyakadi. Mark.13:10.

Ounongo ou otau ingidilwa ovashima, ovasheki nomalai. Ovanhu voludi eli, ovo ova-tondwa vomongudu keshe yomokukalamwenyo okutameka meumbo fiyo omoshiwana.

Vamwe ova kanifa nokuli eteelelo muvo. Ova talwa ve he na onakuiwa nokuli. Ova kanifa omhepo yomaliudo, yohole, yombili, yeshikulafano, yelongelokumwe, omhepo yomumwatate nosho tuu yelininipiko noyeduliko yo.

Ovanhu voludi eli otava pumbwa va alukile komakumaido. Oshitya elidilululo osho oshimwainafana noshitya okwaaluka, okupiluka.

Monghalo i he na ounongo otamu pulwa mu diwe opo ku pitilwe mounongo. Ounongo ou oo Omhepo yaKalunga ya tulilwe momunhu petameko nowo eendjovo daKalunga. Kol.3:16.

Ngeenge eendjovo daKalunga tadi kala momunhu, nena oye ombuto iwa noku na ounongo washili muiye. Ovo ve he na ounongo ou, otava pulwa va aluke ve uye okulihonga eendunge, opo va dje oushima.

Omuprofeti Jesaja okwa ti: Ovanhu voludi eli ove na omatwi, ndele ihava udu ko, ve na omesho ndele ihava mono ko, ve na omadiladilo, ndele ihava diladila. Jes.6:9-10.

Kalunga oye ta ifana noshilanduli osho

ehandu laye ngeenge ihatu dulika keifano olo. Ngeenge hatu popi exulilo lounyuni, okwa diladilwa epangulo laKalunga, ta pangula ounyuni.

Jesus okwa ti: "Ame ondi li pamwe nanye omafiku aeshe fiyo exulilo lounyuni." Mat.28:20. Omhepo yaKalunga oyo ekalepo laalushe lOmunaenghono adishe. Ndele enyamukulo laxuuninwa keshiivifilo leendjovo daKalunga kwaavo ve di anya olo exulilo loshiponga.

Etumo levaengeli olo elondwelo tali tetekele ehandu laKalunga. Onghe omutumwa oku na okukala nomalaka avalu; "Ondaka inyenye" nosho yo "Ondaka yehanauno nexulepo kokuhaitavela."

Paulus Heita



Ovaevangeliste Petrus Kaindume (kolumosho) naAndreas Muleka

OMULAUU:

Pafatululo lomuyevangeliste Petrus Kaindume

Omulaulu owa kala pehevelolela lounyuni. Oo oshinima shii, sha mana. Omulaulu oo efina loinima aische ii. Omunhu nge ta ende momulaulu, ota mono oiponga ihapu. Eembudi ohadi endele kumwe nomulaulu.

Oku na yo omulaulu wokomwenyo hau di kusatana, noye xe yao. Ovana vaKalunga ove na okutonda omulaulu nova kale peendjovo daKalunga. Jes.49:9; 50:10; Joh.3:19.

Omuyapostoli Johannes ota ti: MuKalunga kamu na omulaulu, 1Joh.1:5-7. Omuyapostoli Paulus ota londwele ovaitaveli va kukume omulaulu, 2Kor.6:14b.

Natu tondeni omulaulu

OUYELELE:

Pafatululo lomuyevangeliste Andreas Muleka

Ouyelele oo oshinima shiwa, naau ta ende muo, ota mono oku ta i naashi a hala ote shi hololelwa kuyelele.

Kalunga okwa tula po omauyelele opavali; wopalutu nowopamwenyo. Etango nohani neenyofi otai minikile eshito. 1Mos.1:3-4; 15-16.

Efina louyelele oKalunga nOmona Jesus. Meulu puKalunga kamu na omulaulu. Ehol.21:11-22.

Moses nokupopifwa kuKalunga naye okwa tambula oshinge shouyelele. 2Mos 34:29.

Fye ovaitaveli ohatu teelwa tu ende mouyelele weendjovo daKalunga. Jes.9:1; Joh.8:12.

OMUMVO GWAAGUNDJUKA: 1985

NKENE OMUMVO GWAAGUNDJUKA GWOPAIGWANA GWA TOTWA PO.

Okuza etotopo lyiligwanahangano (VVO) momumvo 1945, omukundu gwaagundjuka muuyuni ogwa li gwa talika ko ongoshinima sha simana, ngoka gwa ningilwa oonkambadhala okuhupitha epipi tali ya konkalo yiita, nokulongitha wo omadhiladhilo guuyuni okuhumitha komeho onkalo yopaliko noyopankalathano yaantu ayehe.

Eyambidhidho lyomadhiladhilotokolo lyomumvo gwaagundjuka olya zi ihe komapangelo ogendji, komahangano nokaantu yi ili noyi ili. Momasiku 17 Desemba 1979, Oshigongi shaayehe sha VVO osha pititha okatokolitho 34/151 nkoka ku utha kutya, omumvo nguka, 1985, ogu na okukala omumvo gwaagundjuka gwopaigwana ngoka gu na iipalanyolo tayi landula: Eitulomo, Eputuko nOmbili.

Pethimbo lyomutumba omuti-35 gwOraata yAayehe yo VVO, Okakomitiye ka thikama miilyo yiilongo 24 mbyoka yi li iilyo ya VVO, oka langekwa po nelalakano lyokulungekidha Omumvo gwAagundjuka gwopai-gwana.

ELALAKANO LYOMUMVO GWAA-NDJUKA GWOPAIGWANA

Etotopo lyOmumvo gwAagundjuka ngoka tagu tyapulwa nuumvo muuyuni auhe, osho euliko lyomikundu dhiigwana muuyuni ndhoka tadhi londo pombanda kombinga yonkalo yaagundjuka. Okwa dhiladhilwa wo shoka shi na okuningwa po mokoopaleka eshito netungo lyonakuyiwa yomuntu.

IITSA YA SIMANA YOMUMVO GWAAGUNDJUKA

Mpaka otapu landula ihe iitsa yimwe mbyoka ya simana yi na okukonekwa methimbo lyetyapulo lyOmumvo gwAagundjuka:

- Okwiindjipaleka ontseyo kombinga yonkalo yaagundjuka, omaudhigu gawo nomategameno gawo kofi yaagandji yooveta yoshigwana;

- Okuhumitha komeho ondjila yomulandu nooprograma ndhoka dhi na sha naagundjuka ongoshitopolwa shimwe ashike sheputuko lyopausosiale nolyomahupilo; ayihe mbika oyi na okulongwa pankalo, pantseyo nopauwanawa woshilongo kehe;

- Okwiindjipaleka eitulomo lyaagundjuka miilonga monkalathano, naunene tuu mehumokomeho nomokumona eputuko nombili;

- Okuhumitha komeho mokati kaagundjuka ombepo yombili, yesimanekathano noyevathano mokati kiigwana;

- Okugandja omukumo kombinga yelongelukumwe poompito adhihe dhokuputudha nokutekula aagundjuka.

Okushilipaleka nokugwanitha po iilalakanenwa mbika (ya tumbulwa pombanda). Omumvo nguka gwAagundjuka otagu gandja ompito yomadhiladhilonongelo ga hwepopala kombinga yekwatathano nelongelukumwe lyiigwana muuyuni.

Omumvo nguka, 1985, otagu gandja wo ompito yokunawapaleka iinima mbyoka tayi nweha mo omidhingoloko dhonkalathano yopausosiale yomugundjuka, iinima mbyoka yi na okunawapalekwa pakwathano lyopaigwana muuyuni.

Omumvo gwAagundjuka ogu na wo okukala ompito yokukonakona, okugongela iipumbiwa monkalo yaagundjuka nokuvongokonona omaudhigu nomikundu dhaagundjuka, opo aagundjuka ya thike ponkatu yeputuko lyesiloshimpwiyu lyuugundjuka wawo.

Pakwatho ndika aagundjuka otaa mono wo owino wokupaathana nokupingakanitha ashike shoka tashi tungu uukwatya wuugundjuka methimbo lyawo ndyoka egundjuka natango.

ONKALO YAAGUNDJUKA MUUYUNI

Maakalimo ayehe muuyuni, konyala omu na oopelesenda 20 dhaagundjuka ndhoka dhi li kofi yomimvo 15-24 notadhi talika ko ko VVO ongaantu mboka ye li mongundu yaagundjuka.

Momumvo 1980 omwaalu gwaagundjuka muuyuni ogwa li tagu tengenekwa gu li oomiliyona 857. Omwaalu ngoka ogwa indjipala noopelesenda 67 methimbo lyuule womimvo 20. Etengeneko lyo VVO otali ulike kutya momumvo 1991, omwaalu gwaagundjuka muuyuni auhe otagu ka vula obiliyona yimwe, ihe kakele owala shila ke ngambeko lyoluvalo ndyoka tali ka indjipala momimvothele tadhi landula ko.

Omwaalu ogundji gwaagundjuka (oomiliyona 665) ogu li miitopolwa yuuyuni mbyoka inaayi putuka nawa ngaashi; omii-longo yaAfrika, Asia naLatin Amerika. Miitopolwa mbika yuuyuni omwa tegelelwa mu kale eindjipalo enene lyaagundjuka.

Etengeneko lyomumvo 2000, otali ulike mpoka kutya aagundjuka miitopolwa mbyoka ya tumbulwa otaa ka thika ko ye li oomiliyona 896, oshoka otaa ka indjipala, noopelesenda tadhi tengenekwa dhi li 83,5%.

Ekonakono opo lya ningwa otali ulike ano kutya, oohapu dhiipatululo monkalathano yaagundjuka momumvothele nguka odho ndhika: "Ompumbwe", ompumbwe yiilonga", "okulongithwa inaashi uthwa", "uunkundi wiilonga", "omikalo dhegameno", "eimoneno lyomboloto", oshowo eigan-djo lyomuntu mwene.

Unene tuu oongundu dhaagundjuka ngaa-shi ongundu yaakiintu, ongundu yaagundjuka momikunda, ongundu yaagundjuka miilando, ongundu yaagundjuka iilema nongundu yaagundjuka oontauki - odho ihe oongundu ndhoka hadhi adhika unene komikundu dhonkalathano methimbo lyone-na - omukundu ndhoka tadhi nayipalekwa unene komalunduluko gopahumokomeho lyopamahupilo nomaunongononi gopauteknika.

Ihe Omumvo nguka gwAagundjuka, ogwa tegelelwa gu tyapulwe unene momudhingoloko, moshilongo oshowo nopaigwana muuyuni, oshoka iilonga niitopolwa oya yooloka yaagundjuka.

IILALAKANENWA MBYOKA YI NA OKUNDHINDHIKWA MOMUMVO NGUKA GWAAGUNDJUKA:

- Etaandelitho lyomakankameno geitulomo lyaagundjuka momudhingoloko nomii-gwana yuuyuni;

- eindjipalo lyokupa aagundjuka iilonga nekondjitho lyokatongotongo;

- okushilipaleka aagundjuka eputudho (elongo), eputudho lyuuteknika nolyeithano;

- okutala nawa esiloshimpwiyu niilonga yaagundjuka aakiintu meputuko;

- okuhumitha komeho nokukwakanitha iilonga yoshigwana ngaashi eputudho lyuukalinwa, elongo, epulando lyofamili niilonga yilwe yonkalonawa mbyoka tayi kwatha omugundjuka mokutsikila miilonga yokwiikwatha mwene ongomugundjuka.

Melongekidho lyelandulathano (lyoprograma), Oshigongi shAayehe sho VVO osha popi nomuthindo iikando oyindji oshilonga sha simana kombinga yeitulomo lyaagundjuka miilonga; mbyoka tayi tameke pegumbo (momudhingoloko), moshilongo, miitopolwa nopaigwana.

(VVO 6/84)

DHA ZI MOMUKUNI

OMUNASHIMPAGA OLYE?

Omunashimpaga oye omuntu ngoka a ningina muule welongelokalunga lye note ekelehi ehistolli alihe lyuukriste.

Okwiitaala wo kutya okwa pewa etumwalaka lyoshili kuKalunga, nokwe shi pewa pamukalo omukumithi, nopandjila yi ili yaa shi yopahistolli lyuukriste.

Aaniimpaga otaa ti oyo ayehe aantu yaKalunga notaa tegelele aantu ye ya landule. Etumwalaka ndyoka ye li pewa kuKalunga, okugalula mboka ya pukithwa kelongo lyopakriste.

Omolwashike aantu taa yi kiimpaga?

Omumvo gwa yi, otwa li twa popi sha kombinga yiimpaga, unene mbyoka hayi ithanwa o-bbults. Otwa li wo twa tumbula yimwe komadhina nomakotalongo gayo. Nena mpaka otwa hala okutala kutya omolwashike aantu taa yi kiimpaga?

Kepulo ndino oku na iinima oyindji tatu vulu oku yi tumbula, ihe mpaka otandi tumbula ko owala yimwepo.

1. Aantu otaa yi kiimpaga, oshoka otaa mono etaambo lyopaumwayinathana, nuukuume mboka inaaye u mona mongeleki yawo.

2. Otaa mono ompito yokuninga sha mongundu. Omunashimpaga gumwe okwa pula ndje epulo ndi. Mongeleki yeni ohamu longo ngiini? Onda mu hokololele oshilonga shaasita naayevangeliste naadiakoni.

Sho nde mu lombwele kutya aasita oyo ye na uuthemba wokutopola Omasakramendi naayevangeliste ngele ye shi uthilwa. Okwa ti "tse mongeleki yetu otwi itaala muusaseri waayeh." "

Ngele ope na omuntu a hala okushashwa, otaa gongala owala e taa hogolola mokati kawo omuntu ngoka e na okushasha omushashwa.

Mongeleki yawo kamu na aasita. Osho enota lyomuntu ndyoka a li e li na mongeleki, otali lotekwa. Yamwe oya yi kiimpaga sho ye na enota lyoshilonga shuusita. Nena mongundu ndjoka a yi mo, oti idhimbulula ngaangoka e shiwiki nokwa pumbiwa.

3. Miimpaga omuntu ita ethelwa muudhigu nando owontumba.

4. Aaniimpaga ohaa yamukula epulo kehe lyomuntu ngaashi omupuli tashi mu opalele. Tu tye; Eva ina lya oshiyimati; oya lala nasatana. Omapulo goludhi ndoka, otagi inyenge unene maagundjuka.

5. Aaniimpaga otaa longo aantu omikalo dhelongelokalunga, nkee omuntu e na okwiilonga Ombimbeli, okugalikana nokuuvitha.

6. Yamwe otaa yi kiimpaga sho ya dhimbulula kutya oya ninga omapuko mongeleki yaandjawa. Ongele omusita nenge omuyevangeliste, omudiakoni nosho tuu.

7. Yamwe oya yi kiimpaga omoluuvu. Opu na iimpaga oyindji mbyoka tayi ti oyi na oonkondo dhokwaaludha. Otayi galikanene aavu ya aluke. Ihe oshikumitha osho shika, kutya ngele ye mwene ta alukwa nenge omukulukadhi gwe, oto adha ngaa a kalela oshipangelo.

Mupyamunene mboka ya galikanenwa notaa ti oya aluka, onkee tuu otaa ehama ngaashi mboka inaa ya galikanenwa.

Ngele oku na iinima oyindji mbyoka wa dhimbulukwa ya fala aantu kiimpaga inaandi yi tumbula mpaka, kwatha ndje u yi nyole pokambapila, u yi tumine ndje huka kOshigambo, Ondonga.

Ngele ihe twa tsakanene naantu mbano otu na okukala nayo ngiini? Natu endulule shoka twa li twe shi popi omumvo gwa yi.

1. Twa sheke nokushundula omaitaalo gayalwe.
2. Twa gwile montopo yomalimbililo, tse tu ethe po eitaalo lyetu. Heb. 10:25.
3. Tu kwatheni aantu yetu, okuuvako elongo-itaalo lyawo, opo ya wape okwiithikamena.
4. Tu taleni shoka tatu ilongo kuyo, otashi vulika ku na iiholelwa yimwe iwanawa.

Ngele tatu tsakanene naantu ya tya ngeyi tu dhimbulukwe kutya, otatu tsakanene naantu mboka tu ya hole. Onkee tu na okukambadhala oku ya uvako kutya omolwashike ya ningi aala-

nduli yongundu ndjoka.

Mpaka otatu vulu okutsikila nomapulo ogendji. Otu na wo okukotoka mokuyelekanitha elongo lyetu nolyiimpaga. Oshoka otashi vulika miinima yimwe otwa tsa kumwe.

Natu dhiladhile nando okombinga yOmbimbeli. Iimpaga oyindji otayi lesa Ombimbeli noku yi longitha momauvitho gawo, noyi itaala kutya Ombimbeli oyo enwethomo lyOmbepo Ondjapuki. Oyo oohapu dhaKalunga.

Ihe nando ongeyi, mbala otapu ya omayooloko miinima yimwe, ngaashi moshinima shuukwatatu, Kalunga a ningi omuntu muJesus Kristus, nosheyumuko lyaJesus kuusi noshilonga she shekulilo kuGolgota.

Omolwaasho Lukas, omuyevangeli, ota popi petameko lyomushangwa gwe, ngeyi:

"Ano oyendji sho ya tameke okutungo ehokololo lyiinima mbyoka ya ningilwa mokati ketu, ongaashi mbeyaka ya li tango ooitaali naalongi yoohapu ye dhi tu thigile, nangame wo sho nda konakona shili ayihe ngashi ya landulathana okuza ketameko, onda hala ndi ku shangele, Teofilus omusimanekwa, opo u tseye omahokololo ngoka we ga longwa ogo gashili" Luk.1:1-4; kutya ehupitho oli li muJesus awike, Iil.4:12.

Rev. Salomo Elago



Ehangano lyOsikola yOsoondaha, muSoomi olyu utha omumvo gwonuumvo (1985), gu kale wo gweputudhilo lyaanona ombili. Shoka osha kwatelela mo iinima tayi landula:

- Omunona a dhimbulule ombili maakuluntu ye mboka e li puyo esiku kehe.
- Omunona i ilonge nokuputudhilwe okugundjila powandaha nenge melongelokalunga.
- Omunona a putudhilwe okwiinekela aantu nokwiinekela wo Kalunga.
- Osho wo omunona a putudhilwe okuuvu ko nokusimaneka aantu yalwe.

Opwa kumagidhwa omunona a putudhilwe okuninga omudhingoloko gwe moka ta dhana esiku kehe gu kale gu na ombili.

Ebandulo ku ELOC ne- tsomukumo kaanashi- longa

Momukwetu gwaJanuali 30.1985, pepandja 8, omu na oshipalanyolo "Okugandja iiniwe yOmuwa kegongalo pakulikola. Mpaka otwa hololelwa etokolo lyOshigongingeleki oshiti 12.

Manga Oshigongingeleki inaashi ka mana iilonga yasho muDesemba, pokati mpoka ondu uvile omufodhlo kutya shimwe shomiihupe yikundathanwa, iigandjwa pashitimulongo.

Ondi ikwata pomutima okudhiladhila oshizemo koshinima shika, oshoka orda dhiladhila kutya, shimpa tuu ELOC a tokola aantu ya gandje oshitimulongo miigandjwa pandandalunde, nena e tu ngambeke ihe okukwatha iikandjologanga yilwe megongalo nomongeleki.

Ohaluka yowala Omukwetu gwaJanuali 30.1985 gwe ya neyamukulo ewanawalela ndyoka ngame tandi nyengwa oku li fatulula niitya yandje. Mokuyanuna pepandja ndika tango, nokulesha oshipalanyolo, omeho gandje oga kwatwa koshidhungwe nokanda li ndi wete we oondanda, omoluumbanda waashoka tandi ka tsakaneka moshipopwiwa shoka.

Mokwiidhiga momemo nomokumonununa ishe-
we omukumo gwokulesha, onda ka tsakaneka shoka nda li inaandi shi dhiladhila nande, osho opelesenda yimwe yomondjambi mokugandja paimaliwa.

Onda li nda kumwa noonkondo. Onda li ndi ipula nkene she ende. Onda koneke Ombepo Ondjapuki oya wilike moshinima shika. Onda mona eyamukulo lyothaathaa. ELOC panduli-
lwa etokolo lyoye!!

Aanashilonga aaholike, ELOC okwe tu dhimbulukitha oshinakugwanithwa shetu ethimbo alihe tu na iilonga. Otashi vulika nee pu na ngoka waa uvite nkene to shi tompola nonando ou na ehalo.

Otandi ku tsu omayele kutya, nonando ELOC e ku pule opelesenda yimwe yondjambi yoye komwedhi, onawa u kuthe mo oshitimulongo, oyo nee moshitimulongo to kutha mo ihe opelesenda yimwe ndjono to yi fala kiigandjwa. Iihupe mokaketha koye koshitimulongo to longitha miikandjologanga yilwe megongalo nomongeleki.

Onda tala kutya nduka olwo olunza lwetu lumwe lwomomalunza ngoka ga simana okulonga iilonga yegumbo lyetu egongalo.

Moku shi ninga otatu holola ebandulo lyetu sho tu li aanashilonga. Otatu holele wo aakuluntu yetu paMbimbeli. Natu tale iiholelwa yimwe:

1. Kain naAbel oya gandja kuKalunga omapandulo gawo, sho ya koneke kutya oya yambekwa muashihe ye shi pumbwa. 1 Mos.4:3-4.

2. Noa sho a hupithwa megeelo lyeyelu, sho a lombwelwa a pite mowato, okwa tokola okugandja omafikilondjambo, e ta kutha miinima ayihe iyelele, kokutya mbyoka iivanawa noya simana kuye 1 Mos.8:15-20.

3. Abraham he yoshigwana, okwa tokola nokuli okugandja shimwe shomulongo shaayihe, sho a

pewa kuKalunga aatondi miikaha ye, nokwa hupitha omutekulu gwe Lot, eliko lye naantu ye. 1 Mos. 28:20-22.

Nonando aantu yaKalunga yopetameko oya li neuvito lya tya ngaaka, onkene tuu aantu yopokati ngaashi tse wo, twa dhimbwa okugandja oshitimulongo, onkee Kalunga te tu dhimbulukitha oku shi ninga note tu uvanekele wo omayambeko ngele tatu shi ningi pwaa na omangu-
ngutulo. Mal.3:10-11.

Helvi Nakale

Nandi pukululwe wo

MOmukwetu No.2/1985 otamu popiwa kombinga yomukalo omupe gwokugandja iigandjwa megongalo. Epulo oli li ihe mpaka:

a) Okomukalo ihe guni aantu taa tseya kutya ope na elunduluko, sho aantu yamwe ihaa lesa OMUKWETU?

b) Ngele onde ya poshinyanga shegongalo, ongame he popi kutya ohe kwata iimaliwa ingapi, nenge amushanga moshinyanga ota tseya ngiini iimaliwa mbyoka ndi na okufuta?

Filippus Shigwedha

EYAMUKULO:

Etokolo lyomukalo omupe gwokugandja iigandjwa megongalo, olya ningwa mOshigongingeleki shono sha li sha kalelwa po kaasita ayehe yomagongalo nokaatumwa ya hogololwa megongalo kehe ya kalele po egongalo lyawo.

Aantu mboka oya fatululile omagongalo gawo o-matokolo agehe ga ningilwe koshigongi naandyoka wo lyokugandja iigandjwa.

Amushanga moshinyanga kee shi omukonakoni gwoondjambi dhaakwanegangalo. Moshinyanga kehe omwa tsilikwa ombapila ndjoka tayi fatululile omugandji shono e na oku shi futa.

Pauyelele wombapila ndjoka, omugandji oye mwene ta tokola iimaliwa mbyoka e na okukutha mondjambi ye omwedhi kehe.

Otashi vulika ngaa omuntu u gwile memakelo lyokukotokela moshinima shoka, ashike oshiponga shaAnanias naSafira, oshi li wo elondodho enene kutse.

Amushanga gwOmukwetu

Omaudhigu pamwe no- shilonga shuupangi

"Otashi ehameke omuntu omutima okudhiladhila shono tashi ningwa mekonomi lyoshilongo neshonopeko lyomahala gaapangi miilonga oshowo eshonopeko lyaalongwa mosikola yuupangi, omukalo ngoka itaagu ka kandulitha po nando ompumbwe yaanashilonga kooaha nooha dhoshilongo", osha tiwa kufolo E.B.Ngavirue metumwalaka lye lyaKrisimesa ya zi ko.

Efelo Ngavirue omupresidente gwEhangano lyaapangi ayehe muNamibia (Nursing Association of SWA), mwa kwatelelwa wo oshitayi shomOwambo. Moshifonkundana shEhangano ndyoka, (Newsletter) efelo Ngavirue okwa tsu omukumo aanashilonga mboka, kutya nonando omaudhigu opo ge li miinima yopaekonomi noyomangambeko gomahala giilongam oshinakugwanithwa shetu shotango aapangi, itatu shi etha nando okuyambula po epango lyopetamekolela, ihe otatu ningi ashihe shoka tatu vulu tu yakule aantu yetu pamukalo gwoshinakugwanithwa muunongo nomeuvitopamwe lyuuwehame.

Aapangi mboka aayakuli mokati kiigwana yAaluudhe oya tamekele okuputudhilwa oshilonga shoka papangelo okuza 1959,tango mboka ya li ya piti Ositanda 6, nokonima Ositanda 8 omumvo 1965 pehulilo. Eputudho lyAatiligane olya tameke 1960.

Aayakulipangi yomuNamibia oya kwatakani-
thwa nOraata yaapangi yomu SA okuza 1973.

Mokuulika kekondjo enene ndyoka tali ningwa kaapangi haa longo kuuklinika koombinga noombinga dhoshilongo, omupangi Ngavirue okwa ti:

"Oshilonga sheni katu na siku natu ke shi dhimbwa".

Okwe ya dhimbulukitha wo kutya omumvo 2000, ogwa uthwa kehangano lyuundjolowele muuyuni (World Health Organisation WHO) gu kale "Omumvo guundjolowele komuntu kehe."

Sebulon Ekandjo

OWE SHI SHIIVA TUU KUTYA:



Okunwa otaku nyonauna oilonga yovanhu, unene tuu oyo tai pumbiwa oungulungu nelituleme ngashi: okushoneka, okuvalula omivalu, okufaneka oinima nokutula oinima melandulafano, nokudimbuiukwa nawa.

Omunhu a makela mo, oshinima keshe te shi ningi, otashi mu pula efimbo liile shi dule nale.

Oikolwifa otai etele ovanhu oiponga mokulonga nomashina ngaashi meefabulika, meengalashu, meembeka nomoitomeno. Ominwe otadi tetwa ko noupu eshi omunhu ina lungama.

Outeknika moikwamashina eshi tau ehene komesho, oilonga ihapu otai ka pula ovalidiliki. Ou ta makele oikolwifa nande okanini ota nyengwa okudiinina omashina oo mape taa ka totwa.

"Eke lomulidiliki ihali kakama."



OMBILIVE KANASKOLA NAAILONGI:

Aasimanekwa,

Omumvo gwa yi, gwa yi nuudhigu nomupya gwago. Oshizemo shomakonakono moongundu oonene mooskola dhetu, osha li sha nku-ndipala nayi noonkondo. Shika inashi ya mushoshene, ope na ngaa shono sha li po. Itashi pumbiwa unene okulililwa, oshoka omukulugwonale okwa tile:

“Konima yomaale ihaku zi we omagadhi.”

Ihe nasho oshi na elongo kune, enene kumboka mwa ndopa, okutala mwaa ishune we moshiponga sha tya ngeyi hashi etwa ashike kokwaalesha nokokwaaitulula mo melongo. Kumboka inamu ndopa, taleni mwaa tale kutya ngame ohandi piti aluhe, nuumvo itandi ihepeke we, aawe. Tsikila ko noonkondo shi vilithe omumvo gwa yi.

Otu li momumvo gwaagundjuka gwopaigwana moka taa tegelelwa ya ninge iigongi, ooprograma dhomathigathano momaimbilo, omaudhano nuunongononi, ihe unene wo okwiilonga opo yi ilongekidhile onkalamwenyo yokomeho ombwanawa.

Mombilive ndjika otandi ka ukilila iinima iishona manga. **Shotango:** Longekidha manga u li mOstanda Ontihamano, kutya oto ka ninga omushike:

Oyendji yomune ngele wa pulwa, kutya oto ka ninga omushike, eyamukulo ohali kala ngeyi: “Kandi shi wo.” Ondi shi shi kutya yamwe oya sa ohoni okuholola kutya otaa ka ninga aashike, oshoka otaa shekelwa eithano lyawo. Mpaka opo pwa zi oyendji hamu kutha omaithano nomailongo ga puka, oshoka ihamu pula mu pukululwe, ne ihamu popi, opo mu endekululwe.

Yamwe itamu popi kutya otamu ka ninga aashike, oshoka kamu shi shili kutya otamu ka ninga aashike. Sho oshiponga nee, omuntu ta zi mostanda VI kee shi shi kutya ota ka kala omushike sigo ta yi mOmatilika.

Shino otashi ti kutya ihamu dhiladhila komeho? Kamu na sho hashi mu fuula? Kamu na iilonga mbyo hamu hokwa nohamu ihalele? Kamu na oopulana dhasa?

Ngele osho shi li ngeyi, ngaashi nda tumbula metetekelo, omiinima ayihe nenge omiinima ashike yomailongo?

Osha yela kutya onkalo yetu nomoshilongo shetu kamu na manga omaithano ogendji, kakele kuulongi nuupangi, uusita, uupolisi, uuhingi wiithauto nuunangeshefa. Sho osho nee hatu adha oyendji taa tala noya hala ashike okuya mumbyoka.

Ihe dhimbulukweni kutya onkalamwenyo yokomeho oyi li miikaha yeni aagundjuka. Nomaitano niilonga yilwe itayi ka holoka po nande manga pwaa na mboka ye yi ilongela. Ope na iilonga oyindji itaayi longwa natango

nenge itaayi egululwa, ihe omolwompumbwe yaantu ye yi putudhilwa.

Aandohotola yiimuna, yuunongononi, yomayego, yomeho nomakutsi. Haandohotola ashike, ihe aailongi ye na oograade miinima yomahupilo paimaliwa (Business Economic), montseyomwenyo (Psychology), mondjalulohokololo (Statistic), mooveta dhuunangeshefa (Commercial Law), miinima yonkalathano yopashigwana (Social Science), moComputer Scienses, melelo lyokuwilika (Administration), miinima yopapolotika (Political Scienses), melongitho lyondjugo yomambo (Library education), Uunamapya (Agricultural) nenge momeya (Water Affairs).


Patiyali:

Yakwetu, ethimbo nonkalo otayi lunduluka kehe ethimbo. Konima yoomvula omulongo ito ka mona we nande iilonga u na onzapo yOmatilika ayike. Nando okufula iilambo otaku ka pula omuntu a dheulwa miilonga mbyoka. Onkee ito vulu okwiitangela onzapo yOmatilika, itayi ke ku hupitha kombinga yiilonga.

Owa tseya tuu kutya Omatilika muuyuni ongundu yahuginina koskola yaanona? Naa-shika wo kashi li kokule okuya nomooskola dhetu. Ndishi omu li po itaamu vulika moo-



Omusamane I. Iithete



Hostela nomomihandjo?

Tashi ulike kutya elandulathano (System) lyomoohostela nomihandjo ewinayi, oshoka otali mu kutha momagumbo nopaakuluntu kuyeke pethimbo ndyoka mwa li tamu pumbwa natango eputudho lyawo, opo sho tamu ka gwanitha omimvo omulongo nahetatu nomulongo nomugoyi mu shi okuyoolola uuzwanawa nuuzwinayi, opo ihe nduno mu na okuya komihandjo, ihe odhoosikola dhokombanda (University).

Yamwe ndishi omwa hala okuhulitha osikola konima yostanda 8? Shika okwiifulila oshilambo ngoye mwene moka to ka gwila mo, po kaape na ngoka te ke ku hila mo.

Omukalo gumwe gwokwiifulila oshilambo waaha ye komeho, ogwo ehogololo lyiilongwa mostanda 8 nomostanda 10, lya puka.

Ope na oyendji tamu kutha ashike iilongwa ngaashi oHistory, Geography, Biblical Study nomalaka sho tamu yi mostanda 8 sigo Omatilika.

Shaa mwa piti Omatilika noonzapo kadhi na Omathematic noScience Subject, omu na ompito onshona okuya ko university.

Oyendji otamu tanga “oplain” BA. Naandjoka wo itayi ke ku pethitha iilonga yasha, oshoka ku na mpo wa mona onsteyo moshinima sha sheywa (spesialiseer). Yakwetu inamu tila we Omwaalu noSciences tamu ike koshitayi mwa londa ko.

Kumboka mwa pita ko nale koUniversity, inamu gwanenwa kiilonga konima yo BA, B.Sc. nenge B.Sc.Ed. Omwa tseya ngaa kutya ndhika oonkatu dhopevi? (undergraduated degree). Namuhuya moshipopriwa she mepito lya Miss Hilma Tshilongo lya BA Th. okwa tile; oBA. B.Sc – Bachelor otashi ti omupombolume muunongononi.

Tashi ti, otamu pumbwa mu ninge o M.A. (Master in Arts) tashi ti, u hokane muunongononi. Sho ishewe konima ya MA, oto pumbwa u ninge uundohotola (doctorate), opo nee u talwe wa popyoka moshikandjo shoka noto vulu okupulakenwa muuyuni.

Yamwe omwa li tamu tanga kutya otamu yi kuupangi mboka mwa li hamu tala wa fa u na ombiliha okwaadhika. Uupangi nawo ngashingeyi wa nukile mpee. Nandi mu yakeleko; otapu fofotolwa kutya, uupangi poovula ndhika tu uka, otatu ka pula onzapo yOmatilika yi na Omwaalu noSciences.

Tala kep. 8

Ombilive kaanasikola

Dha za kep. 7

Yakwetu otu li pevi kombinga yelongo lyopombanda. Ine mana manga okuyalula, ihe kuumbangalantu nkoka ku na aakalimo opelesenda 45% lwaampoka dhaakalimo yomevi ndino, okuza mo 1964 sho tate Daniel Hans Namuhuya a ningi oBA lwotango, huka sigo oompaka otu na aantu 20 ayeke ya mono oonkatu (grade).

Aandohotola yomiti ya vulu pomulongo lwaampoka, yopateologi yaali, moScience katu na nando gumwe manga. MA degree aawe, kakele ko M A Th. dhi li puntano lwaampoka. Otu na M.Soc. Science yimwe ashike.

Ngele otashi nyenge huka ku na aantu oyendji, oko ku na aalongwantu aashona ngeyi, ngele okuumbugantu wo'shilongo hu ku na aakalimo aashona, nena omwaalu omushonalela.

Otatu popi nokwiithana emanguluko lyevi. Emanguluko otali pumbwa aalongwantu naantu ye shi kwiidhiladhilila nokwiithikamena miinima ayihe.

- Mokudhana uudhano ito ilongo u pite nawa. Mokuhogolola iilongwa yaa fele nokumona onzapo yomuliko, kayi na ompito yoku kutaambitha koosikola dhopombanda, hangoye ashike to shuna monima, ihe oto shunitha oshigwana nevi lyetu monima.

- Mokuhulithila oskola pokati nokutondokela miilonga kuyele, dhimbulukwa kutya mboka taa ka za konima yoye, oyo taa ka tulwa komeho goye e to gu ko, openzela inaayi thika.

- Ehumokomeho neputudho lya yela nolya gwana, oli na okukwatelwa komeho kaakwa-shigwana yoyene. Uuyuni osho u na okukala nomalongelokumwe nomakwatathano mpoka omuntu ku na sha, ihe ngele omuntu ta zi kiilongo te ya e ku pe okulya mokana nokasindo kashi shi eputudho shoka, ihe ekolonyeko.


Nandi endulule noku ku kumagidha kutya: Hogolola eithano lyoye manga kuyele. Hogolola iilongwa tayi ku pe onzapo ya gwanapo noyi ihwapo.

- Dhiginina okwiilonga manga u li poongundu dhopevi, opo u itungile omukanka gwa kola hoka-to tungile onakuyiwa yoye.

- Pula oowino noondunge kombinga yokuhogolola iilongwa yoye osho wo eithano lyoye. Dhimbulukwa wo nokwiilonga kutya: Muuyuni kamu na shoka oshipulela nenge oshidhigudhigu.

- Sho taku ti omumvo nagu kale gwa yambekwa, otashi ti! Ou na okulonga muudhiginini, ye Kalunga a yambeke shoka to longo.

**Omakundo gombili
Immanuel Sh. Iithete**



Nakusa Tomas Nikanor

A sile mondholongo

Omusamane Tomas Shindobo Nikanor (48), okwa adhikwa a sila mondholongo mOtjiwarongo. Osha tseyithwa kombelewa onene yaapolisi mOvenduka.

Omusamane Nikanor, pUuhongo, mUukwanyama, okwa dhimbululwa eti 27.1.1985, kutya okwa mana oondjenda. Ekonakono moshinima shoka okwa tiwa otali tsikilwa natango.

Epangelo lya SA omasiku ga zi ko opo lya futile R 88 000 kaakwazimo lyomulongi Jona Hamukwaya, mOkavango, ngoka naye wo a mana oondjenda konima yethimbo efupi sho a kwatelwe po kaapolisi 1982.

Ekundo kaaleshi ayehe

Aamwatate muKristus Jesus, otandi mu kundu notandi mu halele ompolo miilonga yeni. Nuumvo otu neni oshipalanyolo shomumvo: "Jesus Kristus oye ombili yetu".

Otu neni tuu ombili naayehe? Tu imangeni kumwe mombili yaJesus noku mu longela. Tu idhidhimikilathaneni nokudhimitathana po oondjo.

Otandi halele wo aanyoni yOMUKWETU uukolele nombili yaJesus. Kol.3:12-14.

Nendongo T. Uukule
Mariental

Epangulo molwaShaan-nyenange

Omusamane Boas Mweendeleli, omukuluntu gwopoosa yaNdangwa, nomunashilongo pamwe naye Immanuel Moongo, oya holokele mompangu omwedhi nguka mOvenduka okugandja uumbangi wawo kutya oya kwatha mefadhukopo lyoonakudhipaga omuleshi gwoonkundana mOradio Owambo, omusamane Martin Shaan-nyenange.

Ayehe yaali oya zimine ekwatho lyawo moshinima shoka.

Omudhimba gwanakusa Shaan-nyenange ogwi itsuwa 27.8.1983 momukunda Onangwe muusilo wOwambo, konima yoomwedhi ndatu sho pwa kundanwa kutya okwa yakwa po kiikulo yaSwapo.

Oshihauto shanakusa osha ka adhikwa kuVeikko Paulus Nghitewa (24) sho pwa monika oshiponga shiyyenditho mushoka shimwe sha li shaakwiita, opo ya zi ya kwatwe.

Nghitewa oye omupangulwa gwotango pamwe naSem Mundjindi (28) mboka ya talwa oyo ya dhipaga Shaan-nyenange noye mu yuga eliko lye. Shoka oye shi ikala.

Moongo okwa hokolola mohofa kutya muMai 1983, okwa falele kongalasho mOwambo, osheenditho shoka taku tiwa osha yugwa nakusa. Okwa gandja elombwelo olwala lwoshihauto nonomola yasho yi lundululwe.

Paumbangi waangoka a li po pekwapo lyaShaan-nyenange, Sylvi Haiduwa, okwa lombwele ohofa, kutya oonakutamanekelwa edhipago; Nghitewa naMundjindi oye ya pokastola mpoka ye ha longo.

Sylvi okwa ti, ye okwa tseyi shito Nghitewa, ogwaantsezi ye noku shi shi kutya oshikulo. O-sitola oyaGeorge Nelulu popepi nOndobe mUukwanyama. Osha li muJuni 12, 1983.

Molwekwatathano lyopaukwazimo, Sylvi okwa ti okwa ka popitha Nghitewa, mpoka a lombwelwa kutya oya hala okuyaka po Shaan-nyenange. Nongele ota yakele ko nakusa, nena ote mu monitha oshiponga.

Konima yokathimbo Shaan-nyenange okwa ziwa po nokahauto ke moka aatamanekwa wo ya li mo e taa yi.

Komatangolela, Sylvi okwa ka mona okahauto taka piti po, Shaan-nyenange kee mo nopo i ihula oshinima mpoka.

Pehulilo lyomumvo gwa zi ko Nghitewa naMundjindi oya holokele lwotango mohofa mOvenduka, e taa dhimbululwa kutya kaye na omadhiladhilo manga ga yela gokulandula epangulo.

Oya tuminwa koshipangelo ku SA kaatseyimwenyo, hoka ya zi ishewe ye lwetike kutya ngashingeyi otaa vulu ihe okulandula nawa epangulo lyawo.

Hahende David Saggot gwaJohannesburg oye e ya lile po mepangulo, nahahende Estienne Pretorius oye e lile po epangelo. Epangulo otali tsikile natango.

PUKULULII NDJE

Mondjalulamasiku oohapu dhomEtitano 18.1.1985 dhongula opwa nyolwa 1Kor.:25-31, taku landula mEtine Mo.31:1a, osho tuu?

Helvi Iikukutu
Oshaango

EYAMUKULO:

Otandi pandula shili kompito nda li nde yi inekelelwa ishewe okutala oohapu dhOndjalulamasiku. Onda kambadhala okuyanuna mOmbimbeli mpoka tapu tiwa opwa zi oohapu nonda dhimbulula iinima oyindji.

Otandi yi topola moongundu mbali. Ongundu yotango otayi kwatha mboka ye na uuhokwe momikalo dhiinyolwa, nontiyali otayi yamukula ompumbwe ya pulwa.

Ebandja 10- Esiku lyeso lyOmukulili 5 Apilili, omu na okukala olwala oluluudhe, halutokele ngaashi sha nyolwa po.

A) Ebandja 21 pevi opu na 1Mos 3.13b (noohapu dha tulwa po, ihe sho to yi mu 1Mos ngoka ito adha mo oohapu ndhoka. Ngame mwene kanda li ndi na ethimbo lya gwana ndi tale odha kuthwa peni nepuko olya ningwa ngiini. Ashike onda tala ngaa oontompolwa dhopuushiinda - onda ndopa.

Ebandja 7 pevi ope na oohapu dha nyolwa dha za mu Petr 3:12; oshi na okukala 1Petr 3:12 (gwootango.)

Ebandja 9 eti 31 olya nyolwa e taku landula: Osoondaha yliyale nsht, ihe oshi na okukala: Osoondaha Os. yliyale nsht.

Ebandja 16 pevi, ope na oohapu dha kuthwa mu Ps, ihe Eps osho wo pebandja tuu ndyoka eti 3 Juli, ope na 1Pet ihe 1Petr.

Eti 13 Sept moohapu dhokomatango opwa nyolwa 4Moas ihe 4Mos.

Ebandja 25 pevi ope na oohapu dha za mu Dan 7: 14, nodha nyolwa po, ihe ngele to leshe oto adha pe na okavundakano. Tashi ti, onawa shili ngele oohapu tadhi nyolwa ngaashi dhi li mOmbimbeli nenge ku longithwe "international marks,, ndhika (ngele opwa thigwa sha nowina).

Apilili 28 shono shi li mondjila: 1Mos 1:1-5,27-2:2, shono shi li po osho omukalo gwokupopya, hagwokunyola.

Mai 3 Joel 4:1-3,10-12 (katu na Joel ontopolwa ontine) shomondjila: Joel 3:6-21

Mai 23 Joh 7:37-39 oshi li mondjila
Mai 25 omu na ishewe Joh 7:37-39 mondjila Jes 41:17-20
naMai 26 Joh 7:37-39 oshi li mondjila, oshoka oohapu dhomOsoondaha. Opo kwaa leshwe sha faathana mEtine mEtihamano, nomOsoondaha, nena mEtihamano omo mu na Jes 41:17-20.

Septemba 18 mondjila: 4 Mos 27:12-23

Kotoba 19 mondjila: Judas 20-25

Kotoba 24 mondjila: Filem 1-22

Desemba 10 mondjila: Jes 63:15-64:3

Desemba 23 Mal 3:19-24 (katu na oovelise ndhika muMalakia), mondjila:Mal 4:1-6

Ondi inekela ngashingeyi oshi li ngaa hwepo.

Tomas Shivute

Aagundjuka oyendji inaa tseyaya okulesha nokunyola

Konyala aagundjuka oomiliyona 221 miilongo opo tayi putuka, inaa tseyaya natango okulesha nokunyola.

Osha tseyithwa kEhangano lyaaniilonga muuyuni auhe, muGeneva. Uutsini nuukolokoshi oyo iinima tayi koko maaagundjuka mboka yaa na iilonga.

Iilongo opo tayi putuka; Asia otali tengenekwa li na aagundjuka oomiliyona 137, Afrika oomiliyona 45 naLatin Amerika oomiliyona 19.

Aagundjuka muuyuni auhe otaa tengenekwa poomiliyona 665.

EFYO

Omushamane Abraham (Haufiku) Shipoke, okwa xulifa oweenda waye meongalo lavo Eembaxu, eshi a vela efimbo lile oule weedula hamano. Omulumenhu ou okwa kokololela vahapu meongalo.

Okwa fiya ko omukulukadi waye, ovana va 8, ovatekulu 73 novatekulululwa 18. Nakufya okwa dalwa mounyuni wohamba Mweshipandeka.

Ohatu mu pandula amushe ava mwa li mwe tu twa omukumo neendjovo daKalunga. Kundweni neimbilo 568.

Ponhele yovatekulu
P. Simoneni Kandume

Ongula yEtine 17.1.1985 keembinga adishe nhee deongalo okwa li taku linyenge eendadilaka, omolwomuhongifikola wetu meme Josefina Nghipukuula oo e tu fiyapo ombaadilila, mouyehame wokafimbo kaxupi moshipangelo shepangelo mOshakati.

Meme Nghipukuula, omuhongi mukulu mofikola Eembaxu. Okwa li ha wanifa oinakuwanifwa yaye. Omunandjungu, omupezimbo, omulidimiki, omunambili, ongudi yeongalo.

Omwene Kalunga ketu, fitika emuveld linene olo twa fiilwa apa la mbwalangadja.

Eefiye, ookaume amushe, likoleleni mOmwene. Lesheni Mat.5:3-12. Eimbilo 525.

Veronica K.Malangu.

Ondjokonona paxupi yanakufya omufita Elia Nghikembwa

Elia yaPaulus yaNghikembwa okwa dalwa 24.9.1937. A dalelwa mOmahenge aHaxwema.

Elia mokuputuka kwaye okwa li okamati okaduliki nokanambili. Okukala kwaye mokudanauka okwa holola omadidiliko oshilonga shaye shoufita. Mokudanauka navakwao okwe va lombwela va tunge ongeleka yavo yoixwa.

Yee okwa kala nee ta tii: Ye omufita, vakwao ovakwaneongalo. Okwe liningila ondjafa yaye yoixwa ya twa pedu. Ta hondjele omafo omifyaati kumwe, vati Ombibeli yaye. Okwe va lombwela ve liningile yo Eembibeli davo domafo a tulwa kumwe nomakiya.

Okwa kala nokuudifila vakwao. "Omedina laXe nOlomona nolOmhepo Iyapuki," Oyo oitya a kala e hole unene. Popepi nongeleka yavo oyo yoixwa, ova fa po nee elambo vati omaendo.


Momaendo omo va kala nee nokufudika mo keshe osho tava mono, kutya nee okapuka ile okambishi ka fya. Ye ta yapula nee ombila yako.

Okwa kala yo nokulonga vakwao omaimbilo, nokwa li e hole eimbilo olo: "Etemba la londwa kuElia."

Oinima ikwao, tala Omukwetu No.1/1985 Ep.7.

Okwa fiya ko omufiyekadi meme Rauna nounona 10 oumati noukadona.

Andreas H.Nghikembwa



Nakusa Elia Nghikembwa

A dipaelwa moshihakulilo

SA A PWA MO MUANGOLA?

ENGELA:

Onghundana ikwao yoluhodi oya hanga ombelewa yOngeleki, eshi omushamane Lukas Kandje, umwe wovashilonga moshihakulilo shOngeleki mEngela, Oukwanyama, a dipawa 17.2.1985, fimbo a nangala mombete youyehame.

Inapu kwatwa omunhu moshiningwanima osho, ashike pakonakono lovapolifi, vati eemhadi dovadipai oda tauluka ongaba da ya muAngola.

Nakufya Kandje, ou a kala omukulu-nhu wokombifa yoshihakulilo shaNge-la, okwa li a tambulilwa mombete konima yefiku limwe, eshi a mona oipute yeeholo meumbo laye, omo a hangikile kovakwaita inava shiivika.

Eumbo laye kali li unene kokule no-shihakulilo. Fimbo a li mombete komakende moshihakulilo, ovadipai ove ya ufiku langhele po 10.00 tave mu yashe, onduda omo kwa li a nangala oye aeke, tai xwama omundilo.

Omubishofi K.Dumeni eshi a pulwa kOMUKWETU, kutya ota tile ngahelipi oshiningwanima osho, okwa mwena okafimbo noluhodi linene moshipala, nde ta tumbula:

“Epulo oli li ashike kutya fiyo onaini tu na okukundana eenghundana domaludi aa. Ongeleki otai ekeleshi omukalo keshe wedipao, kape na mbudi kutya owa ningwa kulyelye.

“Kombinga ikwao otashi koleke osho Ongeleki tai shi indile ovaitaveli momaongalo nomomaumbo ve shi ninge - okwiilikanena onghalo ei tu li mo, fiyo Kalunga a nyamukula.”

Epukululo kovanyasha

Ovanyasha vakwetu, tu longifeni efimbo lopaife pakriste. Otu li mefimbo lidjuu shili, ashike kelidjuu li tu imbe okulonga.

Ohatu handuka nge hatu pukululwa. Oshinima eshi keshiwa. Ihatu fimaneke vali ovakulunhu ngaashi oshipango oshitine tashi tu pula.

Tu ningeni hano ovalidiliki voikunwa omo Satana hapitile noupu. Tu kaleni ovailikani. Ovanelao oyo eehepele keemwenyo davo, osheshi oshilongo sheulu oshavo.

Mesag Petrus

Okuza omasiku 19 gaNovomba 1984, SA okwa zimine okwiikutha mo muumbugantu waAngola. Ishewe omasiku ngaka okwa hokololwa ombelewa yomukalelipo gwaAmerika mOvenduka kutya oya-patelele 15.2.1985.

OLUHODI LWETU LOTEKA

1. Ogo ge mu tumbu a thikame
Sho ga kala taga pi
Etokolo a mono, opo a laleke
A ka kuthwe omayego
Nani shika elongekidho
2. Aniwa omukuluntusikola
Ine mu thithimana
Ezimino okwe mu pe
Katate a yi mela lyondjila
Ya lamba opate yokuzilo
3. Pahokololo ina shi mu iyaka
Ye omukumo ina kanitha ishewe
Ombili-nyanyu a li e na
“Amuhe iitenya yandje
“Onda vala omumati”
Omategu paanasikola ooyakwawo a ningi
4. Inaa kola ya ye kokule
Pomukwiyu ngaa gwosholo mpano
Lyo otali taalele kOngandjera
Pevi tali ya hukulile
Oshikogo shomuzimbi sha tholomwa
5. Otwe shi taamba sha za mongodhi
Mofunguna ya dhengwa kAashakati
Ndika elaka lyoluhodhi tu na
Eso lyaNduviteko lya thiki
Nani kage shi mayego
6. Tse inatu lolodhweni yakwetu
Keso lyomugundjuka Sylvia
Omukumo twaa kanitheni
Natu dhameni meitaalo
Tu tungathaneni meitaalo
Oonkondo tu pewe moluhodhi
7. Natu galikaneneni okamati ketu
Ho twa thigilwa kunakusa
Ekandjo gwetu ngoka twa pewa
Tu mu humbateni momagalikano
A putuke pahalo lyaKalunga
8. Ekandjo lombwelwa kuKalunga ee'
Opo u putuke u na oondunge
Koka wo meitaalo li na omukumo
U yakule po, ngoye ngo twa thigilwa
Kamati ketu u kale u na oondunge
9. Okwa kuthwa po shili omugundjuka
Omunambili nomuyakuli
Ndele natu itheteni omahodhi
Ndyoka ehalo lyaKalunga
Oshikongo sholuhodhi shi tu siikile
Ntowele a tetekele kaandjetu
10. Omukiintu a shitika moondunge
Omunandjungu miilonga
Omikeenathina metumo
Kaakuluntu naanona ooyakwawo
Muye oshindjola ku mana
Omategu omuye ga lala
11. Ependa lyetu vululukwa
Kala nombili pOmukulili
Tula omeya pomuzile
Tse oshikako oshile twaa na ko
Manga tatu ya Sylvia Nduviteko
Tu kaleni muwanawahenda waTate

KuNaambo A.Shaanika

Sylvia Shaanika, omunasikola mOseko yaNgandjera. Okwa sile 24.1.1985, moshiponga shekandomo lyoshihauto pokati kaShakati nOngandjera. Oye osheli shatate Simon (Kwedhi) nameme Otilie Shaanika, mOluteyi.

Mbuka owo uudhano tau tutula mondambo yuupolotika waNamibia omasiku ngaka.

Petameko lyomumvo 1984, omapangelo giilongo iyali, SA naAngola, oga li gu uvathana ga huliithe po omalugodhi ngoka ga kala pokati kaakwiita yilongo mbyoka. Euvathano olya ningilwe muLusaka, oshilandopangelo shaZambia.

Euvathano olya kwatelela mo iinima tayi landula:

a) Aakwiita ya SA mboka pethimbo ndyoka ya lala oshitopolwa shuumbugantu waAngola, ya kale ya shuna kaandjawa.

Pamwe naashika epangelo lya SA li kale itaali gandja we ekwatho kehe lyopakwiita kehangano lya Unita ndyoka tali kondjitha epangelo lyaAngola.

Tala kepanjia tali landula

ATUSHE VAMWE

Ovalaule ningeni mu dimbulukwe
Ovawambo mu ninge mu nongonokwe
Nokutya kamu lihole, ohamu limange
nye vene
Dipaa koye, manga mukweni ta tumu

Shihopaenenwa shiwa, taleni kwaava ve
ya mo
Elongelokumwe mu li monene kovaenda-
nandjila
Ovalyati veehoni, ve na oukumwe umwe
Ovadjaailongo e shi kulikuminina
Dipaa koye, mukweni ta tumu

Nge wa tale koitevo yonale, to kumwa
Nge wa tale konima oko twa dja, to fi
ohoni
Oku na ongano ikumwifa, yaKavandje
naShimbungu
Dipaa koye, manga mukweni ta tumu

Katu shiipo vali Shimbungu naKavandje
Nge mudalelwamo, nge mulyati weehoni
Oshitevo shii nokutongwa, ongano ii
nokutumbulwa
Nge we i tomona, to mangwa, we i popi to
handukilwa
Dipaa koye, manga mukweni ta tumu

Ovalyati veehoni ve ya ve kwete eendjato
De ya dinomilongelo di nokakutu kolwisho
Ke li mumwe nokahongaifa, mu nomu-
nyeka
Omunyeka wamatutu nombili koxulo
yelaka
Dipaa koye, manga mukweni ta tumu

Nambili i li moindjola nomokupopya nge
ta popi
Mu peni omeva a nwe, mboli embobo la
pola kombada
Nde koshi omahengakala
Dipaa koye, manga mukweni ta tumu

Job P.Nghatanga

Dha za kep. 10

b) Angola kombinga ye a ngambeke aakwiita yaSwapo yaa ze muAngola noyaa ponokele we muNamibia.

Omauvathano agehe ngoka oga ningwa po okulanda aniwa ompito yokushunitha aakwiita ya-Cuba ya zemo muAngola; nemanguluko lyaNamibia li gandjwe mbala.

Oongundu ndhoka Swapo na Unita, dhi na sha nomaupyakadhi mokutsakanitha omauvaneko ngoka inadhi kundathanwa nadho. Ashike okuza petuvathano ndyoka okomisi ya za miilyo yomatanga gilongo mbyoka iyali, oya totwa po, opo yi tonatele euvathano ndyoka nkene tali tsakanithwa.

Nonando kwa fa tuu kwa ningwa oonkambadhala dhasha opo euvathano ndyoka li tsakanithwe andola, opwa dhimbululwa, kutya sigo okuthika momumvo 1985, euvathano ndyoka olya hindwa iikando 120. Nokuli muJanuali nuumvo olya hindwa lwo 20, (Adv. 7.2.1985).

Uusama woluhindo ndoka, kehe gumwe gwomaauvathani, ohe u ikutha, e te u tenteke kombanda yamukwawo.

Petameko lyaFebuluali nuumvo, Amushanga gwiinima yi na sha naAfrika, mepangelo lyaAmerika omusamane Chester Crocker, okwa kala ethimbo ele noonkundathana nepangelo lya SA.

Konima yoonkundathana ndhoka omo mwa zi omupopyo gwetegameno, kutya SA okwa zimine a mane mo iihupe yaakwiita ye mboka ya thigala natango moshilongo shaAngola.

OMADINA AMWE EENGHWATWE MODOLONGO

Moshifonghundana The Windhoek Advertiser 8.2.1985, omwa holoka omusholondodo womadina eenghwata dimwe odo di li modolongo, unene odo da kwatwa okudja Januali neudo.

Ovo ekwato lavo la kolekwa kombelewa yovapoli mOvenduka omadina avo otaa shikula apa:

David Jonas, Kleopas Mweuhunga, Petrus Nakushu, Josef Hailume, Timoteus Shikongo, Simon Hango, Sakeus Shaduka, Abisai Ihuhwa, Titus Nashima, Oscar Haludilu, Marius Walomba, Fransiskus Shikongo (Ananias), Paulus Shipweya, Desiderius Ankome, Erastus Utoni, Andreas Namhweya, Reinhold Aumbi (Kwathiindje), Oskar Shikoyeni, Rehabeam Nakatana, Shifidi naPhilemon Amukoto.

Ovo omadina avo inaa kolekwa paveta ovo ava:

Reinhold Shipo, Lucia Ndalyatapeni, Teofilus Shidjuu, Shikongo Kalyenge (Shekutamba), Ndeuka Nakatana, Berhardinus Tshekutamba na Frans Hango.

Omaongalo naa twikile oshilonga shao sheilikaneno onghalo yoshilongo eshi Kalunga e i pungululile kouwa.

Pomupopyo gwopapolitika metegameno ndyoka omo wo mwa zi natango edhiladhilo lyombe-lewa yomukalelipo gwaAmerika mOvenduka yi pate. Ombelewa oya li aniwa ya dhikwa mo okutonatele ithanoko lyaakwiita ya SA muAngola.

EPANGELO LYOPAKATHIMBO - MPC

Oshigongi shoongundu odhindji muNamibia, Multy Party Conference (MPC) shono sha pingene embwinda lyoongundu odhindji, natango kondungu yomilungu dhasho, otaku inyenge enota lyokupewa epangelo lyopakathimbo ndyoka aniwa tali longekidhile oshigwana okutaamba epangelo tali ya.

Hasho lwotango oshigongi shoka shuupaati umwe womeni lyoshilongo, tashi holola edhiladhilo lyokumonena Namibia emanguluko lyopaumwene (inaali ziminwa kuuyuni). Oshe li holola poompito oshindji.

Nokuli poompito dhimwe edhiladhilo ndyoka ohali hala okugandja ethano maalanduli yuupolitika wevi ndika, kutya ohali etwa po ashike okusosa epangelo lya SA na Swapo, mboka ya talwa kuuyuni oyo ye na oshipatululo shemanguluko lyoshilongo.

Moshifonkundana, The Windhoek Advertiser 4.2.1985, omusamane Moses Katjuongua, omuwiliki gwoshigongi shoongundu odhindji, okwa tumbula mo, nkene oshigongi shawo aniwa tashi lalakanene okukutha oshinakugwanithwa miikaha ya SA omolwemanguluko lyaNamibia pashitokolitho 435 sha VVO nenge pondje yasho.

Oshigongi padhiladhilo ndyoka, oshi indile wo shi pewe oonkondo odhindji dhokutokola miinima yekotampango lyoshilongo, osho wo shi indile shi pewe uuthemba womatokolo gamwe miinima yimwe yopondje yoshilongo.

Pehulilo lyomumvo gwa yi, oshigongi shoka osha li sha ningi eindilo kehangano lya SWAPO, opo li galukile muNamibia, li longele kumwe noshigongi shoka. Ngele Swapo ite shi ningi, nena palondodho lyoshigongi shoka, Swapo oti iyedhilile pondje yelongekidho lye-manguluko lyoshilongo.

Meyamukulo lye koonkundathana dha ningilwe pokati komupresidende Kaunda noshifonkundana "Sunday Times", omusamane Pik Botha, oministeli yiikwapondje ya SA, okwa pandula oonkambadhala dha ningwa koshigongi shoongundu dhomeni, unene muKotoba 1984 moka Swapo a hiylwe koshigongi shoongundu adhihe muNamibia, (Observer 9.2.1985), manga Swapo ta tindi ashike.

Omusamane Botha okwa yamukula omusamane Kaunda ngoka a holola omalimbililo ge kiifo, ngele SA okwa mana mo tuu shili okwiithana ko iihupe yaakiita ye muAngola.

Savimbi natango oku li kuye mwene

Omutoto gwonkundana miilongo oyindji yuuyuni, kutya omukwatelikomeho gwongundu ya Unita, omusamane Jonas Savimbi, okwa kwatwa kepangelo lyaAngola, ogwa kuthwa oonkondo ketsakaneno lye na dr Chester Crocker mOkapa petameko lyaFebuluali nuumvo.

Ekwato lyaSavimbi muNamibia wo olya kala tali pewa omaunzapo ogendji kutya oshinima sha ningwa.

Sigo oompaka inaku tseyika omusamane Savimbi shono ya kundathana mOkapa nepangelo lya SA. Ashike osho oshikando oshitiyali, omukondjithi gwepangelo lyaAngola, Savimbi, tashi hololwa paveta kutya okwa talele po epangelo lya SA.

Momumvo gwa yi, okwa li a kala moshituthi shelangeko lyomupresidende gwa SA, omusamane P.W.Botha, sho a langekwa moshipundi shuupresidende. Manga epangelo lya SA tali yematele epangelo lyaAngola molwekwatathano lyalyo na SWAPO, lya epangelo lyaAngola otali yematele epangelo lya SA omolwekwatathano lyalyo na Unita - - - - uuholwaholwa mondambo yuupolitika.

ONKALO YOPAPOLOTIKA MU SA

Onakuyiwa yuumbugantu waAfrika momadhiladhilo gaapolitika kayi na etegameno li etitha oonkondo. Omusamane dr Kenneth Kaunda oye gumwe e na eipulo enene muyo. Iikando oyindji okwa londodha SA okulundulula omulandu gwe gwonkalathano ye nAaluudhe.

Kape na omalimbililo, epangelo lyaReagan nalyo olya yuulukwa oshinima shoka, nando omukalo gwalyo okukwatha SA, inagu taambwa ko kiilongo oyindji yomuuyuni.

Omayinyengo gomeni, unene mokati kaanasikola mu SA, osho wo omukalo gwAaluudhe okutiinda ekotampango epe ndyoka lya talwa kutya inali kwatelelamo nando uuwanawa waakalimo ayehe moshilongo, mbyoka oyo uumbangi wa kola wompumbwe yelunduluko.

Elunduluko mu SA tali ukilile miinima yoshili, olya talwa kutya ongele epangelo tali zimine li kundathane ombili yoshilongo nehanganano ndyoka li li momuthitu, lyaAfrican National Congress (ANC), mewiliki lyaOliver Tambo.

Ehangano ndika mu SA olya kondwa mo pailonga yalyo ayihe 1960. Aawiliki yamwe yahanganano ndyoka oye li mondholongo yethimbo ele nenge yokukalamwenyo, ngaashi omusamane Nelson Mandela, kOntuntu yaRobben.

Oku na oyendji nomu SA wo mboka ya yuulukwa epangelo li mangulule Mandela, opo oonkundathana dhi longekidhwe nawa.

Epangelo olya hala okumangulula omusamane Mandela ngele u uvaneke tango kutya ye ita ka tsikila we, okutsa aantu omaminimini nokulongitha ekuni. Ishewe oku na okukala kevigumbo lyaandjawa. Kombinga yaMandela okwa ti ye ota zimine ashike emangululwo mondholongo:

- Ngele epangelo lya mangulula tango oonkwatwa adhihe dhopapolitika, mwa kwatelelwa omukulukadhi gwe Winnie Mandela.

- Ngele epangelo tali kutha po ekondo lyongundu ya ANC.

- Ngele epangelo itali mu ngambekele mevigumbo lyontumba.

- Ngele epangelo tali gandja emanguluko lyopapolitika, opo aantu ya tokole yo yene, ngoka ya hala e ya lele.

Omayooloko ngoka gopamadhiladhilo ogo ge li natango omukundu omunene muupolitika wa SA.

Sebulon Ekandjo

E TU TETEKELELE

Meme Martha Naanguse Nghilokwa, gwomimvo 92 megongalo Ongwediva, mUukwanyama, okwa mana oondjenda dhe eti 16.12.84, konima yethimbo efupi lyuuwehame. Okwa thigi ko oyana yaheyali, naatekulu 54, aatekulululwa 13.

Okwa li a thigilwa oothigwa kumumwayina Paulina Nghilokwa, dhi li hamano, mono mu na Shikongeni Shayuka, kaadhi na he nenge yina, adhihe okwa thiga dha koka. Aatekulu oye ndji oyomoothigwa ndhoka.

Okwa shashwa 1922 pamwe nokamwanamati Nghininginya yaNghatanga okasheeli ke, hoka ka ka shashwa Josua. Omvula oyo tuu ndjoka omo a hokanwa kutate Timoteus Dengeinge, mOmafo.

Peha lyaakwanezimo, otandi pandula aapangi, mboka ye tu yakula, nuunene aakwanegongalo, Ongwediva, nOshakati. Foibe Kalimba na Justina Shihepo, kundweni.

**Peha lyaakwanezimo
Josua Nghatanga**

Omasiku 25.11.84, Omuwa okwa zimbula Bartholomeus Nashilongo shaLupato (63) muuyuni mbuka.

Okwa li gwomomukunda Onashitendo mUukwaludhi egongalo Elondo. Okwa thigi ko omuseleka dhi gwe noyana yahetatu.

Aune Namupala Lupato

ABC DRYCLEANER YE EGULUKA

Ondjugo yomayogelo goonguwo dholudhi kehe, oye eguluka ngashingeyi. Otayi adhikwa popepilela nOngalashe ndjoka ya tseyika nawa nedhina ekulu; "GERRYS'S MOTORS."

Eyakulo otali monika OMAANDAHA sigo ETITANO okuza potundi 8.00 yongula sigo 5.30 komatango. MOLYOMAKAYA okuza 8.00 sigo 2.00 komatango.

Oondando odha faathana noondando dhomayogelo omakwawo mOwambo nomUushimba.

Ileni keyakulo lyeni lye mu hedha popepi.

**Gweni,
(ABC MOTORS)**

Aaleshi amuhe aaholike, tangi sho twa peweni nonuumvo ndjika ompito yokupenagula momapandja goshifo shika, nokulelesha. Tangi kehalo ewanawa lyokulesha twe li dhimbulula moyendji nuumvo ndjika.

Ano oshifo shika OMUKWETU, otashi mu halele uuwanawa auhe, tse tu yakulathaneni nomwenyo omwanawa nonuumvo.

Ovashitwa aveshe, tu kuweni pombada oita i xule. Alikana oita nai xule. Omwene okuudite oudjuu ovanhu vaye tava hepekwa vo tava dipaafana, tava kufa vakwao momaumbo omolwo-utondwe ashike we lihanena oshiwana.

Natu kuweni onghuo pombada kuKalunga ote tu udu, osheshi okwe tu pa eudaneko liwa eshi ta ti; Keshe eshi tamu shi indile, ohandi shi mu pe.

Ohatu djuulukwa shili ombili ngaashi twa pewa neudo oshipalanyole sha tya ngaho, nongaashi twa peweni etumwalaka komubishofi K.Dumeni pefimbo laKrisimesa. Jesus Kristus oye ombili yetu.

Naemi Homateni



TYRE CENTRE, ONDANGWA,

BOX 237, TEL. 21

**- OTATU UKILILITHA OMAGULU
GOSHIHAUTO SHOYE.**

**- WE HELP YOU WITH TYRES BALANCING
SERVICE.**

**- ONS BEDIEN U MET BANDE BALLANSE-
RING DIENS.**

**MARIO CARVALHO (Omutseyithi / Sales Director / Verkoopsdirek-
teur)**

OMUKWETU

Oye oshifo shOngeleki Onkwaevangeli paLuther yomOwambokavango.

Ohashi nyanyangidhwa mOshinyanyangidho shOngeleki mOnilpa.

Omukuluntu gwoshifo omumbisofi Dr. Kleopas Dumeni,

Amushanga gwoshifo omusita Sebulon Ekandjo

Ondando yOmukwetu muNamibia naSuid-Afrika R 5,00 komumvo.

Palwe muAfrika R 8,00 nokombanda yomafuta 11,00, komumvo. Mondhila R 13,00.

Oondando nomambestelo agebe naga tumwe kOmukwetu, Onilpa, P.Bag 2013, Ondangwa, 9000

**EV. LUTH. OWAMBOKAVANGO CHURCH PRESS
PRIVATE BAG 2013, ONDANGWA 9000
SWA/NAMIBIA**